

Ikinyarwanda II

027

01/08/2022

8:30 AM – 11:30 AM



NESA

**NATIONAL EXAMINATION AND
SCHOOL INSPECTION
AUTHORITY**

**IKIZAMINI CYA LETA GISOZA IKICIRO CYA KABIRI
CY'AMASHURI YISUMBUYE 2021-2022**

IKIZAMINI: IKINYARWANDA

AMASHAMI :

- LITTERATURE IN ENGLISH – FRENCH – KINYARWANDA (LFK)
- LITTERATURE IN ENGLISH-KISWAHILI-KINYARWANDA (LKK)

IGIHE KIMARA : AMASAHA ATATU (3h00)

AMABWIRIZA

1. Andika amazina yawe na numero yawe ku ikayi y'ibisubizo nk'uko byanditswe kuri "Registration form" ariko ubujijwe kubyandika ku mpapuro z'inyongera uhabwa bibaye ngombwa.
2. Ntufungure iyi kayi y'ibibazo by'ikizamini utabiherewe uburenganzira.
3. Ikizamini kigizwe n'ibibazo **makumyabiri na bitanu (25)** n'ibice bine by'ingenzi:
 - Igice cya mbere:** Kumva no gusesengura umwandiko **(amanota 30)**
 - Igice cya kabiri:** Ikibonezamvugo **(amanota 25)**
 - Igice cya gatatu:** Ubumenyi rusange bw'ururimi **(amanota 30)**
 - Igice cya kane :** Ihangamwandiko **(amanota 15)**
4. Ubahiriza itonde ry'ibibazo uko bikurikirana.
5. Subiza muri make utarondogoye.
6. Amazina yawe cyangwa ay'ishuri wigamo ntagire aho agaragara handi hatari ahabugenewe ku ikayi y'ibisubizo.
7. Gusiribanga, guhindagura no guhuza ibisubizo na mugenzi wawe cyane cyane ibipfuye bifatwa nko gukopera cyangwa gukopezwa.

IGITERO CY'UMUNSI W'INYANA

Igitero cy'umunsi w'inyana cyabaye ku ngoma ya Yuhi IV Gahindiro. Impamvu yatumye kiba twayendeyeho kumenya uko uwo mwami yari yarahimbye itegeko yihaye ubwe rikwiye kudutangaza. Abo twabajije badutekerereje ko uwo mwami yari yarahimbye iminsi umunani yagombaga kurangizamo imirimo ye. Ya minsi umunani yarangira, akongera akayisubiramo bityobityo. Umunsi wa munani wari umunsi w'inka. Umwami yirirwaga areba inkanga ze z'inyarurembo, abashakaga kumuhakwaho bakazana inkoni n'inkuyo. Nanone bikaza kurangira mu mataha y'inka.

Iki gitero rero kije guturuka ku munsi wa munani (uw'inka) ni cyo cyatumye bakita "igitero cy'umunsi w'inyana." icyo gihe Yuhi IV Gahindiro yari iwe i Mulinja ho mu Mayaga (mu Ntara y'Amajyepfo). Yari yiriwe akenura inkanga ze arangiriza ku z'inyarurembo zatahaga iwe, zitwaga Urukomera. Uwo munsi rero Sayinzoga ya Mukenga wo mu ntore z'Abashakamba amenya inkuru ibabaje atumweho n'iwabo, bamusaba kubimenyesha umwami. Aribwira ati: "Nindindira igihe cy'amatarama ngasaba icyanzu, biraza kurakaza abandi kuko na bo bifuza kuganira n'umwami." Ati: "Reka nihare, mbimubwire nanone ubwo ari umunsi w'inka arankubita inkoni, ariko nta cyo bintwaye."

Ahengeraga rero igihe umwami ategetse inkanga mu rugo aratanguranywa amubwira ya nkuru. Umwami ntiyamukubita, ariko ntiyagira icyo amushyiriza. Abashakamba bandi babibonye baribwira bati: "Sayinzoga araduhize, kandi abitwiratira ko yanyuze mu iteka ry'umwami ntibigire icyo bimutwara." Bose rero bakurikirana basuhuza umwami bamubwira amagambo atagira aho ahuriye n'iby'uwo munsi. Inkanga zimaze kugera mu rugo, Yuhi IV Gahindiro yica ba bandi bese mu nkanga ya ruguru. Binikiza inkanga. Zihumuye, azana amata yazo arayabaha ngo bayanywere aho ku mugaragaro, imbere y'abashumba n'abandi bari bagitegereje ko inkanga zihumuka. We akibwira ati: "Ni bakuru ntibemera kunywa amata ku mugaragaro, nibanga kuyanywa ndabakubita." Nyamara bo baremura baranywira kuko byari bibateye ubwoba kubona atinyutse kuyabahera aho rubanda bese bareba. Nanone byari bikubitiyeho ko kwanga amata bahawe n'umwami byari umuziro mu Banyarwanda, ubwo abamuhakwagaho bese byitwaga ko bamushakaho amata.

Barangije rero kuyanywa umwami atangira igitarimo gisanzwe. Arababwira rero mu gitaramu ati: "Ubwo ga munyonye amata yazo munyonye na zo ntimushobora kuzigambanira!" Bati: "Ubundi se tutaranywira, twashobora kuzigambanira?" Arabahorera bikomereza ibiganiro bisanzwe byo mu gitaramu. Ngo buke, umwami abwira abashumba b'Urukomera ati: "Nimuzijyane mumere nk'abazigishishije zige

mu Mutara ku nkiko y'i Ndorwa byo kwiyeza kugira ngo Abahima bazinyage." Abashumba bazijyana uko babitegetswe. Koko rero zigeze hafi y'i Ndorwa Abahima barazitera barazinyaga. Abashumba bagaruka i Mulinja kubimenyesha Gahindiro. Babimubwirira mu gitaramo. Arabasubiza ati: "Abahima nibijyanire, ibitagira kirengera ni ko bimera!" Abashakamba bari aho barabyumva, barasohoka bajya inama. Bati: "Izi nka ntizanyazwe bisanzwe, zazize wa munsu twanywaga amata yazo." Baraza babwira Gahindiro bati: "Twanywanye n'izo nka turatabaye tugiye kuzigarura kandi tukumenyesheje ko nta n'imwe muri zo izabura, keretse izaba yarapfuye."

Bahana umunsu wo guhaguruka. Gahindiro arababwira ati: "Tuzahurira aha n'aha kugira ngo nzabaherekeze mbageze kuri Nyabarongo ku cyambu cya Nyaruteja. Koko rero umunsu bahanyeho umugambi usohoye, arabaherekeza bambuka Nyabarongo ahari, ariko Sayinzoga arabura; ntiyaba mu bambukaga. Bageze hakurya, Gahindiro na we arahindukira. Ageze mu nzira ahura na Sayinzoga atabara. Gahindiro ati: "Ni iki cyatumye udatabara mu b'imbere?" Sayinzoga ati: "Natindijwe n'uko namaraga urubanza. Naho abatabaye mbere, niwumva ko ntabafatiye aho barara none, uzanyice!"

Gahindiro rero amutuma ku Bashakamba bese ngo amubatahirize. Uko avuze izina ry'umuntu akamukubita uruti ku rutugu. Akomeza atyo abavuga mu byivugo byabo kandi ari na ko amukubita rwa ruti kugeza abahetuye. Aho bigeze, Sayinzoga aramubwira ati: "Erega ugiye kunshengura urutugu!" Undi ati: "Ni byo koko nyabusa! Na we amuvuga mu kivugo ke anamukubita uruti ku rutugu agira ati: "Urabehe, nawe dutahe." Sayinzoga aragenda afatira igitero mu Bwanacyambwe. Arabatashya uko yabitumwe, arangije ababwira uko Gahindiro yabimutumye amukubita ku rutugu kugera aho yagombye kumwisaba, kuko yamubabazaga. Abashakamba bati: "Byihorere, ntituzabyibagirwa!"

Igitero kigeze ku nkiko y'i Ndorwa, gisanga abatasi bararangije kuyigenda no kumenya akarere katurutsemo abanyaze Urukomera. Ubwo kandi igitero cy'Abashakamba cyari kumwe n'abashumba barwo. Ako gahugu k'i Ndorwa karaterwa, hanyagwa inka nyinshi, maze abashumba b'Urukomera batoranyamo izabo ariko bagasanga hasigaye izindi. Byari byaratewe n'uko Abahima bamaze kuzinyaga bakazigabanya. Uko rero Abashakamba basanze Urukomera zituzuye, bagatera ahandi hahegereye bakanyaga, bityobityo, bigeza aho baheba inka zimwe z'Urukomera. Amaherezo umutasi umwe araza abwira Nkusi ya Gahindiro ati: "Inka nyinshi z'abahima zahungiyemo mu kirwa kiri mu rufunzo, zimaze kugeramo banyereza iteme ngo hatazagira ababakurikirayo." Abashakamba babyumvise batera mu

rufunzo. Nyamara Abahima barabananira kuko bari babyiteze. Ingabo zari zihageze mu gitondo cya kare, maze Munanira wa Nyangezi atuma abagaragu be kumushakira udukwi ngo bacane yote kuko yari arwaye inzoka zamuryaga mu gihe k'imbeho. Abashakamba bamaze guheba uburyo bwo kunesha Abahima aho bashegeye bati : "Munanira naze tubigerageze." Nkusi ya Gahindiro ateguka Munanira guhaguruka ngo bongere batere iteme. Munanira ati: "Mube mworohereje sindasusuruka." Aho bigeze Nkusi aramutota maze Munanira arahaguruka yibindira mu ngabo ye, yiroha ku iteme. Abahima bashwashwanyije kumusubiza inyuma biba iby'ubusa, arabatwaza. N'abandi Bashakamba babuririraho baterura Abahima babasuka muri cya kirwa bakibasangamo babashwaza mu rufunzo. Inka zose zari zarahungishirijwemo ziranyagwa. Abashumba b'Urukomera bazivanguramo izabo ubushyo buruzura.

Ariko ikirwa kimaze gutsindwa, Munanira yanga kukivamo. Nkusi aramwinginga biba iby'ubusa. Umuvuzi w'amacumu aza i Mulinja kumenyesha Gahindiro uko iby'igitero byagenze, amumenyesha n'uko Urukomera zose zabonetse ubushyo bwe bukaba bwaruzuye, amubwira n'uko Munanira yanze kuva muri cya kirwa akaba ari cyo bagombye kugandikamo. Gahindiro yohereza intumwa kubwira Nkusi ko iminyago yose itari Urukomera izaba umuheto wa Munanira, kandi ko bazamugarura ahetswe. Iyo ntumwa imaze kubimenyesha Nkusi, noneho Munanira yemera kuva mu kirwa igitero kiratabaruka.

Ubwo rero hakaba umugabo witwaga Kanyaruguru wo mu mutwe w'Abakemba wari umuririmbyi w'ikirangirire, akaba ari we wazaga kuririmba ingabo izo ari zo zose zitabaruka kuko yari yarabihawe na Gahindiro. Abashakamba baramutumiza bamugambanaho ngo na bo bazahime ibwami bishyurire inkoni Sayinzoga yakubiswe, na we arabyemera. Nuko babigenza batya. Batuma kuri Gahindiro ko begereje kuza ngo abitegure mu minsi iyi n'iyi. Ya minsi igeze, Kanyaruguru aza nijoro ahateganye n'i Mulinja aririmba mu ijwi riranguruye, bigeza ko ibwami bamwumva. Barahuririza bati: "Ni Kanyaruguru, umva araririmba Abashakamba; nta kabuza bazahinguka ejo, aje kubateguriza."

Umunsi ukurikiyeho barategereza baraheba. Na Kanyaruguru akimara kuririmba ararigita. Ajya kwihisha ku byitso by'Abashakamba. Abikora atyo amajoro yakurikiyeho, maze bitera Gahindiro impagarara. Gahindiro uko atumye abantu ngo bamutege ibico bamufate, Kanyaruguru akabimenyeshwa n'ibitso by'Abashakamba akajya aho batamutegeye.

Abashakamba bamaze kubumvisha barashyira baraza, bariyereka bamurikira Gahindiro inka ze z'Urukomera, bamumurikira n'iminyago maze ayibagororeramo uko bisanzwe. Munanira ahabwa inka y'ubumanzi, agabana n'umuheto wose w'igitero nk'uko Gahindiro yari yaravuze. Gahindiro asobanuje ibya Kanyaruguru, noneho bamubwira ko kwari uguhorera Sayinzoga imigiti yakubiswe batabara. Igitero cy'umunsi w'inyana kirangira gityo.

Bifatiye ku byavuye mu gitabo cya Bigirumwami, A., (1964) Imihango yo mu Rwanda, igice cya 1, Nyundo,

IGICE CYA MBERE: KUMVA NO GUSESENGURA UMWANDIKO (amanota 30)

- 1) Uyu mwandiko washyirwa mu yihe ngeri y'ubuvanganzo nyarwanda nyemvugo? (inota 1)
- 2) Tanga izindi ngeri enye (4) z'ubuvanganzo nyemvugo nyabami. (amanota 4)
- 3) Igitero cy'umunsi w'inyana cyagabwe he? (inota 1)
- 4) Sobanura impamvu bakise igitero cy'umunsi w'inyana. (amanota 2)
- 5) Ni nde wabimburiye Abashakamba kugira ngo barenge ku itegeko ry'umwami?
Iryo tegeko barenzeho ni irihe? (amanota 2)
- 6) Kubera iki Abashakamba bemeye kunywera amata ku karubanda? (amanota 2)
- 7) Abashakamba bahoreye Sayinzoga bate? (amanota 2)
- 8) Kubera iki Munanira ari we wahawe inka y'ubumanzi? (amanota 2)
- 9) Yuhi IV Gahindiro yasimbuye nde ku ngoma? Ese we yasimbuwe na nde? (amanota 2)
- 10) Sobanura amagambo akurikira dusanga mu mwandiko: (amanota 6)
 - (a) Inka z'inyarurembo
 - (b) Inka zihumuje
 - (c) Akenura inka
 - (d) Abatasi
 - (e) Abavuzi b'amacumu
 - (f) Impagarara

- 11) Koresha amagambo akurikira yavuye mu mwandiko mu nteruro zumvikanisha icyo ushaka gusobanura: **Abashakamba, amataha y'inka, kwibindira ahantu.** (amanota 3)
- 12) Uzuza interuro zikurikira ukoresheje amagambo avuye mu mwandiko kandi ukore isanisha rikwiye aho ari ngombwa: **ikirwa, kugandika, guca mu iteka.** (amanota 3)
- (a) Umuntu wese ry'umwami baramuhanaga.
- (b) Impunzi ku musozi zitegereje imfashanyo.
- (c) U Rwanda ntabwo arirugomba kubana neza n'ibindi bihugu.

IGICE CYA KABIRI: IKIBONEZAMVUGO (amanota 25)

- 13) Andika ubwoko bw'amagambo atsindagiye ari mu nteruro zikurikira: (amanota 5)
- (a) Twasanze **umuto** aruta umukuru.
- (b) Uyu ni umwandiko **mbarankuru**.
- (c) Aramusubiza ati: "**Ashwi** ntabyo nzi! »
- (d) **Have** sigaho kutubera urukozasoni!
- (e) **Ejobundi** nzajya i Kigali.
- 14) Garagaza intego y'amagambo atsindagiye n'amategeko y'igenamajwi yubahirijwe mu mpine. (amanota 10)
- (a) Karera **ajyayo** buri munsu.
- (b) Aramubwira ati: "**Mpa icyo** gitabo nisomere."
- 15) Hanga interuro zirimo inyangingo zikurikira: (amanota 2)
- (a) Inyangingo ihagitse.
- (b) Inyangingo y'ingaragira.
- 16) Sesengura izi nteruro ugaragaza ruhamwa na ruhamya: (amanota 4)
- (a) Imburagihana yabuze gihamba.
- (b) Uriya musozi muremure uherereye mu Murenge wa Ruramba.

17) Shyira interuro zikurikira mu zindi ndango:

(amanota 4)

- (a) Ndaryama ndiye.
- (b) Wijya kure y'aho abantu batuye.
- (c) Sinkunda kuja kumusura.
- (d) Ukunda gukererwa buri gihe.

IGICE CYA GATATU: UBUMENYI RUSANGE BW'URURIMI (amanota 30)

18) Huza buri gihangano na nyiracyo:

(amanota 4)

- | | |
|-------------------------------|-------------|
| (a) Singikunda ukundi | Nyirarumaga |
| (b) Inkatazakurekera | Biraro |
| (c) None Imana itumije abeshi | Mazimpaka |
| (d) Umunsi ameza imiryango | Mutsinzi |

19) Kurikiranya ibice by'igisigo bikurikira uhereye ku gitangira: umusayuko, impakanizi, interuro, Umutwe (izina).

(amanota 4)

20) Muri iri bango rikurikira:

(amanota 4)

- (a) Garagaza intondeke zakoreshejwe ugaragaza umubare w'utubeshuro.
- (b) Ni nde mwanditsi w'icyo gitabo cyakuwemo iri bango ?
- (c) Andika ibindi bihangano bye bibiri.

Dore intango santango

Utasanga yikorewe

N'umugenzi umwe rukumbi

Kuko ibumbye mu rukundo

Rudakurwa aho ruteretse

N'abataje ari impanga

[....] Amibukiro, 1979, P.53

21) Tanga ingero ebyiri z'ibitekerezo by'ingabo.

(amanota 2)

22) Subiza na « **yego** » cyangwa « **oya** » ukurikije uko amagambo atsindagiye

asomwa :

(amanota 5)

- (a) **Kuvuura** ni uguha umurwayi umuti.
- (b) **Amahôro** ni ayo batanga mu misoro.
- (c) **Kurêshya** ni ukungana.
- (d) **Intâango** ni ikibindi kinini.
- (e) **Impuundu** ni ubwoko bw'inguge.


23) Andika amagambo akurikira mu nyandiko nyejwi :

(amanota 5)

- (a) Impamvu
- (b) Imfunguzo
- (c) Injijuke
- (d) Inshuro
- (e) Igufwa

24) Uzuza iyi ndanguruzi y'ubwumvane :

(amanota 6)



IGICE CYA KANE : IHANGAMWANDIKO (amanota 15)

25) Kora inyandiko igenewe gusohoka mu kinyamakuru ifite umutwe ukurikira :
« Dore ibanga ryo gutsinda amasomo yawe ». Iyo nyandiko ntibe munsi
y'imirongo mirongo itatu (30) kandi igaragaze byibuze amabanga ane (4)
umunyeshuri yakoresha kugira ngo atsinde amasomo ye.

-UMUSOZO W'IKIZAMINI-